

Aktieselskabini anpartsselskabinilu il.il. siulersuisunut ilaasortanik sulisut
qinersisarnerat pillugu Kalaallit Nunaannut nalunaarut (ingerlatsivinni
sinniisoqarneq)

Aktieselskabit pillugit inatsimmi § 178, tak. § 161, imm. 5, Kalaallit Nunaannut kunngip peqqussutaatigut nr. 620-kkut 23. juni 2008-meersukkut atortuulersinneqartoq, aamma anpartsselskabit pillugit inatsimmi § 22, imm. 6, tak. § 79, imm. 2, Kalaallit Nunaannut kunngip peqqussutaatigut nr. 619-ikkut 23. juni 2008-meersukkut atortuulersinneqartoq, naapertorlugit aalajangersarneqarpoq:

Kapitali 1

Sulisut agguaqatigiisillugu amerlassusaannik naatsorsuineq

§ 1. Ingerlatsivik ukiuni kingullerni pingasuni agguaqatigiisillugit minnerpaamik 35-nik sulisoqarsimasutut isigineqassaaq akunnerit suliffiusimasut ukiumut katillugit agguaqatigiisillugit 63.000-iusimappata. Akunnerit suliffiusimasut naatsorsorneqarneranni aallaavigineqassaaq ukiumoortumik akissarsiat agguaqatigiisillugu tunniunneqartartut sulisut agguaqatigiisillugu akunnermusiaannik agguarlugit.

§ 2. Ingerlatsiviup siulersuisui qullersaqarfialu inummit, § 4, imm. 2 naapertorlugu taaseqquisinnaasumit, noqqaavigineqarlutik pisussaapput § 1 malillugu naatsorsuissallutik, tamatumalu inernera ingerlatsiviup sulisuinut nalunaarutigalugu.

§ 3. Sulisoq pineqaraangat tamanna ima paasineqassaaq tassaasoq inuk 15-inik ukioqalereersimasooq, ingerlatsivimmut akissarsiortutut sullissisoq, taamaassananili pineqartoq:

- 1) qullersaqarfimmi ilaasortatut Erhvervs- og Selskabsstyrelsimut nalunaarutigineqarsimappat imaluunniit
- 2) nunap ilaani danskit oqartussaaffigisaata avataani aalajangersimasumik suliffeqarpat.

Imm. 2. *Imm.* 1, nr. 2 naapertorlugu nunap ilaatut danskit oqartussaaffigisaatut isigineqassapputtaaq danskit umiarsuaat aamma nunap toqqaviata ilaa danskit pigisaat.

Kapitali 2

Ingerlatsivimmi sinniisoqarnissaq il.il. pillugu taasineq aamma taasisinnaatitaaneq

Ingerlatsivimmi sinniisoqarnissaq il.il. pillugu taasineq

§ 4. Ingerlatsivik ukiut pingasut kingulliit ingerlanerini agguaqatigiisillugu minnerpaamik 35-nik sulisoqarsimappat, tak. § 1, ingerlatsiviup sulisui piumasaqarsinnaatitaapput taakkua akornanni taasissutigineqassasoq ingerlatsivimmi sinniisussanik taakkualu sinniisissaannik qinersisoqassanersoq (aappeerluni/naaggaarluni taasineq).

Imm. 2. *Imm.* 1 naapertorlugu taasinissamik piumasaqaat saqqummiunneqarsinnaavoq ukunangga:

- 1) ingerlatsiviup suleqatigiinnissamut atatsimiititaani sulisut tamarmiusut akornanni amerlanerussuteqartunit,

- 2) ingerlatsivimmi sulisartut kattuffiinit, soorlu klubbinit sulisullu peqatigiiffiinit, ingerlatsiviup sulisuisa tamarmiusut minnerpaamik 1/10-iinik sinniisuuffiginnittunit, imaluunniit
- 3) ingerlatsiviup sulisuisa 1/10-iinit.

§ 5. § 4, imm.2 naapertorlugu taasisoqarnissaanik piumasaqaat ingerlatsivimmi siulersuisunut allakkatigut saqqummiunneqassaaq. Taasisoqarnissamik noqqaassutip tiguneqarnerata kingorna ataatsimiinnerminni siullermi – kingusinnerpaamilli noqqaassutip tiguneqarneraniit sap. ak. arfinillit qaangiunneranni – ingerlatsivimmi siulersuisut isumagissavaat ingerlatsivimmi qinersinermut ataatsimiititamik pilersitsisoqassasoq maleruagassat § 10-miittut malillugit.

§ 6. Ingerlatsivimmi sinniisoqarneq pillugu taasisoqarsimappat taaseqqittoqarnissamik piumasaqatoqarsinnaavoq siusinnerpaamik taasisoqarnerata kingornaniit qaammatit arfinillit qaangiunneranni.

Taasisinaaneq

§ 7. Aappeerluni/naaggaarluni taasisinnaatitaavoq sulisoq kinaluunniit, tak § 3, ingerlatsivimmi taasisoqarnerata nalaani atorfeqartoq. Qinersinermut ataatsimiititaq nalornisoortoqartillugu aalajangiisaaq oqaaseqatigiinni siullerni piumasaqaat eqquutitinneqarsimanersoq.

Kapitali 3

Ingerlatsivimmi sinniisut amerlassusissaat aamma qinersisinnaatitaaneq/qinigaasinnaassuseq

Ingerlatsivimmi sinniisut amerlassusissaat

§ 8. Ingerlatsivinni, sulisut §§ 13-15 naapertorlugit aalajangersimatillugit ingerlatsiviup sinniisussanik qinersisoqassasoq, sulisut qinersissapput ingerlatsivimmi sinniisunik aalajangersimasunik amerlassusilinnik taakkualu sinniisissaannik, ilaasortat ataatsimeersuartunit qinigaasimasut aammalu malittarisassat naapertorlugit siulersuisunut ilaasortat pisortat oqartussaataannit imaluunniit allanit qinerneqarsimasut amerlassusaasa affaannik amerlassusilinnik, ikinnerpaamilli ingerlatsivimmi sinniisunik marlunnik. Ingerlatsivimmi sinniisut qinerneqartussat amerlassusaasa kisitsisitaat akunnappat qummut akunnaallisaasoqassaaq.

Qinersisinnaatitaaneq/Qinigaasinnaassuseq

§ 9. Qinersisinnaatitaavoq sulisoq kinaluunniit, tak § 3, qinigassat allattuiffiisa tamanut saqqummiunneqarneranni aammalu qinersinerup nalaani ingerlatsivimmi atorfeqartoq.

Imm. 2. Qinigaasinnaassuseqarpoq sulisoq kinaluunniit, tak § 3, nammineersinnaassusilik aamma qinersinissaq sioqqullugu qaammatini 12-ini kingullerni ingerlatsivimmi atorfeqarsimasoq.

Imm. 3. Qinersinermut ataatsimiititaq nalornisoqartillugu aalajangiisassaaq piumasaqaatit imm. 1-imiittut aamma 2-miittut eqquutitinneqarsimanersut.

Kapitali 4

Qinersinermut ataatsimiititap katitigaanera il.il., taasinermi qinersinermilu periaaseq, matumunnga ilanngullugit taasinertaqanngitsumik qinersineq, qinersinerup inernera aamma nalinginnaasumik qinersineq

Qinersinermut ataatsimiititap katitigaanera il.il.

§ 10. Qinersinermut ataatsimiititami ilaasortaassapput sulisunut aqutsisunullu sinniisut. Qinersinermut ataatsimiititap ilaasortaasa amerlanersaat tassaassapput sulisut sinniisaat, minnerpaamillu ilaasortaqa ataaseq siulersuisunut imaluunniit qullersaqarfimmut ilaasortaassaaq.

Imm. 2. Sulisunut sinniisut ingerlatsiviup sulisuisa akornanni qinerneqassapput ingerlatsiviup suleqatigiinnissamut atatsimiititaani sulisut sinniisuutitaannit. Ilaasortat sinneri siulersuisuinit qinerneqassapput.

Imm. 3. Suleqatigiinnissamut ataatsimiititaqanngippat siulersuisut sulisut sinniisussaannik ingerlatsiviup sulisuisa akornanni toqqaassapput. Ingerlatsivimmi sulisunut sinniisunik qinersisoqarsimappat taakkua sapinngisamik ilaatitaqassapput.

Imm. 4. Sulisut siulersuisunut qinigassanngortittut imaluunniit qinigassanngorteqqittut qinersinermut ataatsimiititamut ilaasortassatut toqqarneqarsinnaanngillat imaluunniit ilaasortaaginnarsinnaanngillat.

Imm. 5. Qinersinermut ataatsimiititami ilaasortaajunnaarnermi ilaasortap pineqartup qinersinermut ataatsimiititaq tamanna pillugu paasitissavaa. Ilaasortamik nutaamik malittarisassat imm. 1-3-miittut malillugit toqqaasoqarnissaa qinersinermut ataatsimiititap tamatuma kingorna isumagissavaa.

§ 11. Qinersinermut ataatsimiititaq siulittaasussaminik nammineq toqqaassaaq.

Imm. 2. Qinersinermut ataatsimiititap aalajangiineri amerlanerussuteqarluni taasinikkut aalajangiinerussapput. Taasisut amerlaqatigiippata siulittaasup taasinera aalajangiisuussaaq.

§ 12. Qinersinermut ataatsimiititaq imaqarnilialiorassaaq, tassani pisimasut pingaarutillit saqummersinneqartassapput, matumani ilanngullugit nalunaarusiat, aalajangiinerit, taasinerit inernerit qinersinerillu inernerit tamarmik.

Imm. 2. Imaqarniliat ingerlatsiviup aqutsisuisa, ingerlatsiviup aningaasaliisuisa, piginneqataassutunik pigisallit sulisullu kiisalu pisortat susassaqartut takusinnaassavaat.

Imm. 3. Imaqarniliat qinersinermut ataatsimiititap ilaasortaani atsiorneqassapput minnerpaamillu ukiuni 5-ini toqqortarineqassallutik.

Ingerlatsivimmi sinniisunik taasinermi periaaseq

§ 13. Qinersinermut ataatsimiititaq pisussaaffeqarpoq pilersinneqarnerminiit sap. ak. sisamat qaangiutsinnagit aap/naaggamik taasititsissalluni.

Imm. 2. Qinersinermut ataatsimiititaq taasititsissaaq ima, taasisinnaasut tamarmik, tak. § 7, taasinermi peqaataanissaannut naleqquttumik periarfissaqartillugit, matumani ilanngullugu pisariaqassappat allakkatigut taasititsinikkut.

§ 14. Taasineq pissaaq allakkatigut aamma isertuussaasumik.

Imm. 2. Taasinermi taamaallaat aappeerluni naaggaarluniluunniit taasisoqarsinnaavoq.

Imm. 3. Ingerlatsivimmi sinniisussanik qinersinissamik sulisut aalajangernerat akuerineqassaaq taasisinnaatitaasut ikinnerpaamik affaat aappeerlutik taasisimappata.

Imm. 4. Taasinerup inernerata pigineqalerniariassappat qinersinermut ataatsimiititap siulersuisut tamatuminnga allakkatigut nalunaarfignissavai aamma taasinerup inernerata sulisunut nalunaarutigineqarnissaa isumagissavaat.

§ 15. Ingerlatsivik umiarsuarni nunani allani angalasuni sulisoqarpat qinersinermut ataatsimiititap sapinngisamik piaartumik isumagissavaa umiarsuarni sulisut taasisinnaatitaasut, tak. § 7, qinersisoqarniarneranik ilisimatinneqarnissaat kiisalu nalunaarutip matuma imaa pillugu.

Imm. 2. Umiarsuarni ataasiakkaani naalakkat nalunaarut imm.1-imi taaneqartoq tiguneqarniariartoq pilersitsissapput qinersisitsisussanik pingasunik ilaasortalinnik, tassaasunik umiarsuarmi aqumiunut sinniisoq ataaseq, inuttat sinnerinut sinniisoq ataaseq kiisalu naalagaq, qinersinermut komité -mut siulersuisuusussa.

Imm. 3. Qinersisitsisussat pilersinneqarnerminniit sap. ak. ataaseq qaangiutsinnagu § 13, imm. 1-imi pineqartumik taasisitsissapput tamatumalu kingorna taasinerup inernera qinersinermut ataatsimiititamut erngiinnaq nalunaarasuartaatikku ilisimatitsissutigissavaat, oqaatigalugu aappeerlutik taasisimasut aamma naaggaarlutik taasisimasut kiisalu taasinnitsoortut atorsinnaanngitsumillu taasisimasut qassiusut.

Imm. 4. Qinersinerup inernera nalunaarasuartaatikku nassiuutiutigalugu qinersisitsisut qinersinermut ataatsimiititaq nalunaarasuartaatikku nalunaarfigisinnaavaat ingerlatsivimmi sinniisussatut taakkualu sinniisissaattut qinigassanngortittussatut kikkut umiarsuarmi sulisunit siunnersuutigineqartut.

Ingerlatsivimmi sinniisunik qinersinermi periaaseq

§ 16. Qinersinermut ataatsimiititap isumagissavaa:

- 1) sapinngisamik piaartumik qinersisoqarnissaa, kingusinnerpaamilli ingerlatsivimmi sinniisoqartitsinissaq pillugu aalajangerneq akuersissutigineqarneraniit sap. ak. 6-it qaangiunneranni, aamma
- 2) qinersinerup imatut ingerlanneqarnissaa, taamaalilluni kikkut tamarmik qinersinnaatitaasut, tak § 9, imm. 1, qinereqataanissaminnut periarfissaqarluartillugit, matumani ilanngullugu pisariaqarpat allakkatigut taasinikkut.

Imm. 2. Ingerlatsivimmi sinniisoqarnissamik aalajangerneq atorunnaassaaq aalajangerneq akuersissutigineqarneraniit kingusinnerpaamik qaammatit 6-it qaangiunneranni qinersisoqarsimannippat.

§ 17. Qinersinermut ataatsimiititaq isumaqarpat qinersineq qinersiffinni arlalinni imaluunniit piffissani assigiinngitsuni ingerlanneqartariaqartoq, immikkut ittunik qinersinermut komite-liortoqarsinnaavoq qinersinermut ataatsimiititamut ikiuuttussanik.

Imm. 2. Qinersinermut ataatsimiititaq qinersinermut komite-mik pilersitsinissaq pillugu aalajangiissaaq taakkualu siulittaasussaannik toqqaassaaq, taamaattoq tak. § 15, imm. 2. Qinersinermut komite-nut § 10, imm. 1-4, aamma § 11, imm. 2, taamatulli atuutissapput.

Imm. 3. Qinersinermut komite-t aalajangiineri qinersinermut ataatsimiititamut saqqummiunneqarsinnaapput.

§ 18. Qinersinermut ataatsimiititap siulersuisut isumaqatigiinniaqatigereerlugit ulloq qinersiffissaq aalajangersassavaa sulisullu tamarmik ulluliussamik naleqquttumik ilisimaarinnissinnaanissaat isumagissallugu.

Imm. 2. Qinersinermut ataatsimiititap ulloq qinersiffissaq sulisunut nalunaarutigissavaa qinersinissamat ulluliunneqartoq sivikinnerpaamik sap. ak. 6-inik sivisunerpaamillu sap. ak. 10-nik sioqqullugu, taamaattoq tak. § 19.

Imm. 3. Ulloq qinersiffissaq pillugu nalunaarutip imarissavai:

- 1) ingerlatsivimmi sinniisussat qinerneqartussat amerlassusissaat, tak. § 8, aamma
- 2) inunnik ingerlatsivimmi sinniisutut imaluunniit taakkua sinniisissaattut qineqqusaartittussanik sulisunut siunnersuuteqaqqusineq. Siunnersuuteqaqqusineri allanneqarsimassaaq qineqqusaartussat amerlassusaat, tak. 8, kiisalu ulloq siunnersuutinik tunniussiffiusinnaasoq kingulleq. Ullup taassumap ulloq qinersiffissaq minnerpaamik sap. ak. 4-nik sioqqussimassavaa.

Imm.4. Qinersinermut ataatsimiititap ulloq qinersiffissaq nalunaarutigigitigalugu sulisut nalunaaruteqarnerup nalaani qinersinnaatitaasut pillugit allattuiffimmik sanassaaq, tak. § 9, imm. 1. Allattuiffik sulisunit takuneqarsinnaassaaq.

§ 19. Ingerlatsivinni, umiarsuarni nunani allani angalasuni sulisulinni, ulloq qinersiffissaq sulisunit nalunaarutigineqassaaq sivikinnerpaamik sap. ak. 9-nik sivisunerpaamillu sap. ak. 20-nik sioqqutsisumik.

§ 20. Qinersinermut ataatsimiititap misissussavaa qineqqusaartittussatut piukkussat qinigassanngortissinnaanersut, tak § 9, imm. 2, aamma qinigassanngorterusunersut.

Imm. 2. Qinersinermut ataatsimiititap qineqqusaartittussatut piukkussat paasitissavai taamaallaat ingerlatsivimmi sinniisuusinnaasut imaluunniit taakkununga sinniisaasinnaasut sulisunit qinikkat, taamaallitut siulersuisunut ilaasortaajutigisinnaanatik ataatsimeersuarnermi qinikkat imaluunniit allanit toqqakkat.

Imm. 3. Ingerlatsivimmi sinniisutut taakkualu sinniisissaattut qineqqusaartut tamarmik immikkut allatorneqassapput. Allattuiffiit taakku marluk ingerlatsiviup sulisuinut nalunaarutigineqassapput ulloq qinersiffissaq kingusinnerpaamik sap. ak. 2-nik sioqqullugu. Qineqqusaartoq ataaseq allattuiffimmi ataasiinnarmi allanneqarsimasinnaavoq.

Imm. 4. Ingerlatsivinni, umiarsuarni nunani allani angalasuni sulisulinni, tak. § 19, qineqqusaartunut allattuiffiit nassiunneqassapput pisariaqassappat nalunaarasuartaatikkut qineqqusaartut aqqi suliffigisaallu taallugit, taamaallit allattuiffiit umiarsuup sulisuinut nalunaarutigineqarsinnaalersillugit ulloq qinersiffissaq kingusinnerpaamik sap. ak. marlunnik sioqqullugu.

§ 21. Qinersisoqarsinnaanngilaq ingerlatsivimmi sinniisussatut taakkualu sinniisissaattut qinigassanngortinnissamat piffissarititap naanerani qinigassanngortittut qinigaasussaniit ikinneruppata. Qinersinermut ataatsimiititap qinersinissaq kinguartissinnaavaa, pisariaqartumik amerlassusilinnik qinigassanngortittoqarnissaa siunertaralugu, kapitalimi matumani piffissarititaasut taaneqartut eqqortillugit. Qinersinerli naammassereersimassaaq immikkut ittumik ataatsimeersuortoqarnissaaq nallertinnagu.

§ 22. Qinersinermut ataatsimiititaq taasiffissanik sanatitsissaaq, taakkunani alfabeti malillugu allassimassapput ingerlatsivimmi sinniisutut taakkualu sinniisissaattut qineqqusaartut aqqi.

Imm. 2. Pappialami taasiffissami allassimassapput qineqqusaartut aqqi, najugaat, suliffigisaat, atorfiat aamma ingerlatsivimmi sulisunit sinniisuuffigisaat kiisalu § 23, imm. 2 naapertorlugu taasisinnaasut amerlassusaat. Allattuiffiit paasissutissanik allanik imaqassanngillat.

Imm. 3. Umiarsuarni nunani allani angalasuni qinersinermi qinersinermut komite-p akuerisinnaavaa allakkap puusnaanut matoqqasumut ikisisoqarluni taasisoqassasoq pappialat taasiffissat imm. 1-imi, tak. imm. 2, taaneqartut atornagit.

§ 23. Qinersineq allakkatigit isertuussaasumillu pissaaq.

Imm. 2. Sulisut tamarmik immikkut amerlanerpaamik taasisinnaapput ingerlatsivimmi sinniisut, aamma taakkua sinniisissaasa, qinerneqartussat amerlassusaasa affaasa nalinginik, tak. § 8. Ingerlatsivimmi sinniisut taakkualu sinniisissaat 2-mik agguarneqarsinnaanngitsumik amerlassusillit qi-nerneqartussaappata taasinerit amerlassusaat qummut akunnaallisarneqassaaq. Sulisut tamarmik immikkut qinigassamik ataatsimik immikkut ataasiaannarlutik taasisinnaapput.

Imm. 3. Allattuiffinni tamani qinigassanngortittunik arlalinnik, imm. 2 naapertorlugu taaneqarsinnaasuniit amerlanerusunik, taasisoqarsimappat imaluunniit qinigassanngortittoq/ut kina kikkut qi-nerneqarsimanersut paatsuugassaanngitsumik ersersinneqanngippat imaluunniit atinik allanik allattuisoqarsimappat imaluunniit taasiffissaq iluarsineqarsimappat, taanna

atorsinnaangitsutut isigineqassaaq. Qinersinermut ataatsimiititaq nalornisoortoqartillugu aalajangiissaaq taasiffissaq atorsinnaangitsuunersoq.

§ 24. Qinigassanngortittut § 8 naapertorlugu amerlassusilerlugit naatsorsorneqarsimasut, allattuiffinni tamani taaneqarnerpaasimasut, ingerlatsivimmi sinniisutut taakkualu sinniisissaattut qinigaasimapput.

Imm. 2. Qinigassanngortittut marluk arlallilluunniit amerlaqatigiinnik taaneqarsimappata qinersinermut ataatsimiititaq makitsinikkut aalajangiissaaq.

Imm. 3. Sinniisissaq amerlanernik taaneqarluni qinerneqartoq ingerlatsivimmi sinniisumut amerlanernik taaneqarluni qinerneqarsimasumut sinniisinnigussaaq. Sinniisissaq amerlanernik taaneqartumiit tulliulluni taaneqarluni qinerneqarsimasooq ingerlatsivimmi sinniisumut amerlanernik taa-neqartumut tulliulluni qinerneqarsimasumut sinniisinnigussaaq, tulliilu taamatut, qinerneqartussat § 8 naapertorlugu amerlassuseqalernissaat tikillugu.

Taasinertaqanngitsumik qinersineq

§ 25. Ingerlatsivimmi sinniisussatut taakkualu sinniisissaattut qinersinermut qineqqusaarnissamut piffissarititap qaangiunnerani qineqqusaartut qinigassallu amerlaqatigiinnarpata qinersisoqassanngilaq, kisianni toqqaaneq taasinerataqanngitsumik qinersinertut pissaq, imaappat:

- 1) qineqqusaartut tamarmik taasinerataqanngitsumik qinersinissamut isumaqataappata, aamma
- 2) qineqqusaartut akornanni isumaqatigiissutigineqarpat sinniisissat ataasiakkaat ingerlatsivimmi sinniisumut kimut sinniisiussanersut.

Imm. 2. Ulloq qinersiffissaq kingusinnerpaamik sap. ak. marlunnik sioqqullugu nalunaaruteqarnermi qineqqusaartut ingerlatsivimmi sinniisutut taakkualu sinniisissaattut qinerneqartutut isigineqassapput.

Qinersinerup inernera

§ 26. Qinersinerup inernera qinikkallu aqqi najugaallu qinersinermut ataatsimiititap imaqarni-liuineranut nalunaarneqassapput, tak. § 12, aamma siulersuisunut qinigaasunullu ingerlaannaq allakkatigut nalunaarutigineqassaaq, soorluttaaqq sulisunut nalunaarutigineqassasoq.

Nalinginnaasumik qinersineq

§ 27. Ingerlatsivimmi sinniisussatut taakkualu sinniisissaattut ukiut sisamakkaarlugit nalinginnaasumik qinersisoqartarpoq, piunasaqaatit § 1-imiittut sulii eqquutitinneqarsimappata. Qinerseqqittoqarsinnaavoq. Ingerlatsivik nalinginnaasumik ataatsimeersuartinnagu qinersineq naammassineqarsimassaaq.

Kapitali 5

Aaqqiinerup atorunnaarnera

§ 28. Aaqqiineq atorunnaassaaq qinigaaffiup naanerani, ingerlatsiviup piunasaqaatit § 1-imiittut taamaalinerani eqquutitikkunnaarsimappagit.

§ 29. Aaqqiinerup atorunnaarsinneqarnissaa pillugu taasineq aallartinneqassaaq illuatungeriit § 4, imm. 2-mi eqqaaneqartut tamanna pillugu piunasaqaateqarpata. Qinersinermut ataatsimiititaq taasititsuussaaq malittarisassat §§ 13-15-imiittut eqqortillugit. Aaqqiineq atorunnaassaaq tamanna pillugu akuersissuteqartoqarsinnaanerup kingunitsiannua.

Kapitali 6

Ingerlatsivimmi sinniisut sulilernerat aamma tunuarnerat kiisalu atorfininnermi inatsisitigut illersugaaneq

Sulilerneq

§ 30. Ingerlatsivimmi sinniisut qinigaaqqammersut siulersuisuni sulilissapput ingerlatsiviup nalinginnaasumik ataatsimeersuarnerata kingunitsiannua. Ingerlatsivimmi sinniisut taakkualu sinniisaat suliinnassapput qinikkat nutaat siulersuisunut isernissaasa tungaannut.

Imm. 2. Ingerlatsivimmi sinniisut taakkualu sinniisissaat Erhvervs- og Selvsskabsstyrelsenimut nalunaarutigineqassapput.

Tunuarneq

§ 31. Ingerlatsivimmi sinniisoq:

- 1) sulisunit tunuartinneqarpat, tak. imm. 4,
- 2) ingerlatsivimmi suliunnaarpat
- 3) nammineerluni siulersuisuniit tunuarpat, imaluunniit
- 4) toquppat

sinniisaata ingerlaannaq taarsissavaa.

Imm. 2. Ingerlatsivimmi sinniisoq pineqartoq sinniiseqanngippat ingerlatsivimmi sinniisussamik nutaamik taassumalu sinniisissaanik nutaamik naammaqutissamik qinersisoqassaaq, sinniisup tunuartup qinigaaffiani sinneruttumi sulisussamik, aalajangersakkat §§ 16-25-miittut malillugit.

Imm. 3. Naammaqutissamik qinersisoqassappat ingerlatsivimmi sulisut 1/10-iisa piumasarisinnaavaat tamatumunnga taarsiullugu qinigaaffiup sinneranut qinersisoqassasoq ingerlatsivimmi sinniisussanik taakkualu sinniisissaanik tamanik. Tamanna pillugu noqqaassut saqqummiunneqassaaq naammaqutissamik qinersinissamut ulluliussaq kingusinnerpaamik sap. ak. sisamanik sioqqullugu.

Imm. 4. Ingerlatsivimmi sinniisumik tunuartitsinissaq pillugu taasineq aallartinneqassaaq peqataasut § 4, imm.2-mi taaneqartut tamanna pillugu piunnaasaateqarpat. Qinersinermut ataatsimiititaq taasititsisuussaaq malittarisassat §§ 13-15-miittut eqquutitillugit. Ingerlatsivimmi sinniisumik tunuartitsinissaq pillugu aalajangiisoqassappat piunnaasaataavoq taamaallaat taaseqataasut amerlanersaat tamaaliornissamut taasisimassasut.

Inatsisitigut illersugaaneq

§ 32. Ingerlatsivimmi sinniisut taakkualu sinniisaat soraarsitaanissamut atukkamillu allatigut ajorseriarnissaannut suliat tungaasigut pineqartukkut imaluunniit assingusukkut sulisunut sinniisitulli illersugaapput.

Imm. 2. Imm. 1 naapertorlugu illersugaaneq pillugu isumaqatigiinngissutit, matumunnga ilanngullugit malittarisassat suut atorneqassanersut aamma malittarisassat unioqqutinneqarneri imaluunniit paasineqarnissaat pillugit apeqqutit, saqitsaattoqartillugu isumaqatigiissitsiniarnikkut aalajanger-neqassapput.

Kapitali 7

Ingerlatsivimmi pissutsinik sulisunut paasissutissiineq

§ 33. Ingerlatsivinni, sulisut ingerlatsivimmi sinniisunik qinersinissaminnik inatsisit malillugit piginnaatitaaffimminnik atorluaaffigisaanni, siulersuisut pisussaaffigaat ingerlatsiviup sulisuinut paasissutissiisarfiisanik pitsaasunik sunniuteqarluartumillu ingerlasunik pilersitsinissaq, ingerlatsivimmi pissutsinik paasissutissiinermi atorneqartussanik. Pissutsinik tamakkuningga paasissutissiineq naleqquttumik pisassaaq. Paasissutissiinermut assersuutigalugu ilanngunneqarsinnaapput ingerlatsiviup aningaasaqarneranut, tunisassiorneranut, sulisoqarnikkut inissisimaneranut siuariartorneranullu tunngassutillit.

§ 34. Siulersuisut aalajangiissapput, ingerlatsivimmi pissutsit paasissutissiissutissallu qanoq ittuunerat naapertorlugit paasissutissiisarfiit sorliit tulluernerpaajunersut. Paasissutissiisuusinnaapput assersuutigalugu siulersuisut ingerlatsiviup ulluinnarni aqutsisui aqutigalugit ingerlatsivinnilu, suleqatigiinnissamut ataatsimiititalinni, taakku aqutigalugit. Siulianitut ittoqartillugu siunertari-neqanngilaq ingerlatsivimmi sinniisut ataasiakkaat ilisimatitsissutinik, sulinerminni ilisimalersimasaminnik, aktieselskabit pillugit inatsimmi § 160, imm. 1, Kalaallit Nunaannut kunngip peqqussutaatigut atortuulersinneqartoq, aamma anpartsselskabit pillugit inatsimmi § 79, imm. 1, Kalaallit Nunaannut kunngip peqqussutaatigut atortuulersinneqartoq, naapertorlugit akisussaassuseqarlutik ingerlatitseqqiisinaanerannik allannguinnissaq.

Imm. 2. Atuagassianik paasissutissiissutinik saqqummersitsineq, suliffeqarfiup iluani sulisunut atuagassiat assigisaalluunniit, suleqatigiinnissamut ataatsimiititani ataatsimiinnerit, sullivinni ataatsimiinnerit ataatsimeeqatigiinnerillu, suleqatigiinnissamut ataatsimiititanit aqqqissuunneqartut, ingerlatsiviup sulisuinik paasititsiniaanermut periusaasinnaapput atorneqarluarsinnaasut.

Kapitali 8

Sulisut piginneqataassutinut allattaavimmik imaluunniit piginneqataasut pillugit nalunaarsuummik takunnissinnaatitaanerat

§ 35. Ingerlatsivimmi aktieselskabit pillugit inatsisip § 49, imm. 2, oqaaseqatigiit pingajuini, Kalaallit Nunaannut kunngip peqqussutaatigut atortuulersinneqartumi, imaluunniit anpartsselskabit pillugit inatsisip § 22, imm. 1, oqaaseqatigiinni siullerni, Kalaallit Nunaannut kunngip peqqussutaatigut atortuulersinneqartumi, pineqartumi, kisiannili ingerlatsivimmi sinniisussanik qinersisoqarfiusimannigitsuni, sulisunut sinniisoq piginneqataassutinut allattaavimmik imaluunniit piginneqataasut pillugit nalunaarsuummik misissuisinnaavoq.

Imm. 2. Ingerlatsiviup sulisui ataatsimoorussamik sinniisussaminnik toqqaareersimappata, imaluunniit sullivimmi ataasiinnarmik sinniisoqarpat imm.1 malillugu pisinnaatitaaneq taassuma pisassaraa. Allatut pisoqartillugu ingerlatsiviup sulisuisa sinniisaasa ilartik ataaseq taamatut pisinnaatitaasussatut toqqarsinnaavaat.

Imm. 3. Imm. 2-mi pineqartut avataatigut allatut pisoqartillugu sulisut sinniisumik ataatsimik akunnerminni toqqaassapput piginneqataassutinut allattaavimmik imaluunniit piginneqataasut pillugit nalunaarsuummik misissuisussamik.

Kapitali 9

Immikkut aalajangersakkat

§ 36. Ingerlatsivimmi sinniisut siulersuisunut ilaasortat sinneritulli piginnaatitaaffeqarput, pisussaaffeqarput akisussaaffeqarlutillu.

§ 37. Ingerlatsivimmi, tassani suliffeqarfissuarmi sinniisoqarnissamik piumasqaatit eqqortinneqarsimanatik, malittarisassat naapertorlugit ingerlatsivimmi sinniisunik marlunnik amerlanernilluunniit qinersisinnaatinneqarpata qinersineq pillugu nalunaarummi matumani malittarisassat taamatulli atuutissapput.

§ 38. Taasinernut qinersinernullu nalunaarummi matumani pineqartunut aamma sulisunik paasisutissiinernut §§ 33-mi aamma 34-mi pineqartunut aningaasartuutit ingerlatsivimmit akilerneqassapput.

Imm. 2. Qinersinermut ataatsimiititaq immikkut ittunik imaluunniit annertuunik aningaasartuuteqassanngilaq, siulersuisut taakkunannga akuersiteqqaareertinnagit.

§ 39. Qinersinermi aalajangernerit aalajangiinerillu Erhvervs- og Selskabsstyrelsimut nalunaarutigineqartussat aktieselskabit pillugit inatsisip §§ 157-ianut aamma 159 b-anut, Kalaallit Nunaannut kunngip peqqussutaatigut atortuulersinneqartumut, aamma anpartsselskabit pillugit inatsisip §§ 73-ianut aamma 78-ianut, Kalaallit Nunaannut kunngip peqqussutaatigut atortuulersinneqartumut, ilaatinneqassapput. Allatut pisoqartillugu isumaqatigiinngissutit nalunaarummi matumani aalaja-ngersakkanut tunngasut eqqartuussivinnit suliarineqartussaapput, taamaattoq tak. § 32.

§ 40. Erhvervs- og Selskabsstyrelsi immikkut pisoqartillugu maleruagassanik §§ 5, 10,15-22, 27-niittunik, oqaaseqatigiit pingajui, aamma 29-niittunik sanequtsisinnaavoq.

Kapitali 10

Pineqaatissiissutit

§ 41. Siulersuisunut imaluunniit qinersinermut ataatsimiititamut ilaasortaq §§ 2, 5, 10 imm. 3, 12-13, 15-16, imm. 1,18-19, 22, 26 aamma 29 malillugit pisussaaffimminik unioqquitsisoq akiliisussanngortinneqassaaq.

Kapitali 11

Atortuulersitsinissamik aalajangersakkat

§ 42. Nalunaarut atortuulerpoq ulloq 1. august 2008.

Erhvervs- og Selskabsstyrelsi, ulloq 28. juli 2008

OLE BLÖNDAL

/Grethe Krogh Jensen